

編號 1 號

【生趣个童年】黃美貞原作

還細時節，細人仔無科技產品好搞，該時，屋簷下、杌仔樹、伯公下、大圳溝、竹林，做下都係佢兜个遊戲場所。

佢四姊妹，還過隔壁鄰舍个細姪仔，長下湊等份家啦、打紙擲仔¹摺搞園人尋等等，係堵著毋使讀書个下晝頭，定著搞到斷烏，等到大人擎等竹修仔來尋細人仔，大家看著毋像勢正溜瀉。

係好天好時，佢這兜乜好在圳溝肚覓蜆仔。有一擺，沙鼻个老弟麥麥滾²，打賭佢捉得著細蝦公，上屋个阿賢好擲擲仔應：「該愛仰般賭？」老弟誚難³佢：「你係捉比佢較多，暗晡夜佢請你食夜。」阿賢堪毋得人激，應講：「好！無問題！」該下晝，佢兜先擱水窟，想摺蝦公餵到水窟肚，毋過，細蝦公哪有恁該捉，兩下半蝦公就躍走咧，佢這兜試著無意思，早就走淨淨。無想著佢兩儕毋認輸，目珠眨都無眨，搥到歸身潦潦、局局糟糟合泥了了，水窟肚斯兩、三尾細魚仔定定，等到斷烏咧，暗摸胥疏，正遽遽轉屋，管佢麼人輸贏？係還毋轉屋，毋單淨無飯好

食，還會賺一身皮肉痛。

又有一日，翕燒个下晝頭，佢兜兄弟姊妹在屋下四圍搞園人尋。老弟係搞頭王，哪位都尋得著來園，搞幾下輪乜搞毋會煞。無想著坐在屋簷下个阿婆大聲喊：「遽遽轉來！毋好在該頭牛眼樹下搞，該位盡多草鞋嫲⁴哦！」頭擺个細人仔輒常打赤腳搞到毋知晝暗，天天个佢這兜，無摺阿婆个話聽入耳，結果做鬼捉人个老妹突然間看著該生到烏疏疏，有十過公分長个弄毛蟲，對等佢趁等過來，嘎走到尾瀉屎！還「哇——」聲嗽出來。好搞个老弟，興蹠蹠仔行兼去想追該尾草鞋嫲，阿婆煞煞咄講：「你係分佢趁到膻身去，斯會像貓拖糞粑——難敲爪⁵哦！」

「良言莫嫌少，朋友莫嫌多。」還細時節跔等同學伴摺隔壁鄰舍个細姪仔弛崗打陣，滿哪仔都係佢這兜共下行過个腳跡、看過个景色、搞過个生趣事，係佢這兜細人仔當懷念个童年，該兜生趣个回憶摺畫面，永久都會留在佢个腦膈肚。

¹ 紙擲仔：音 zhi' piag er；紙牌，指孩童時期玩的圓形紙牌。

² 麥麥滾：音 da' da' gun'；誇言也。

³ 誚難：音 sau' nad；嘲笑譏刺。

⁴ 草鞋嫲：音 co' hai ma；攀附在樹枝上全身長滿毛刺的毒毛蟲。

⁵ 敲爪：音 lud zau'；本指爪子脫落，後亦借指人脫離困境或陷阱。

編號 2 號

【 佢曉搵手咧 】 廖惠貞原作

佢在屋下座大，阿姆講：「最大个愛有好樣。」所以佢常常帶等老妹共下學習摺搵手。又聽阿婆講：「有緣正入共家門，一屋下人愛共心。」所以佢也當聽話。

佢雖然生到像大人恁高，毋過佢今年正十空歲定定，還係細人仔。屋下个世大人有四儕，阿公、阿婆、阿爸摺阿姆。佢看世大人歸日愛上班賺錢，日日做到兩頭烏，實在辛苦！細人仔當然愛多學做兜事情較好哪！

從細佢就好在灶下看阿姆煮食，佢對一年生開始，就會搵手。阿姆煮菜、佢煮湯，兩儕歡喜煮食，七手八腳菜就上桌，阿爸講佢恁乖，老妹摺佢拍手，佢越學就越快樂！佢也盡好跔阿婆去市場。市場係鬧熱又生趣个所在。做得認識當多東西，尤其係青菜，像苦瓜摺黃瓠愛掛皮煮，菜瓜摺瓠仔愛刨皮，芹菜愛食莖，番薯葉、芥藍菜葉仔摺莖斯做得食，細笏瓜¹洗淨就好食，蔥仔、蒜仔仰般分，這兜全係在買菜時節學著个。

逐日除忒微毛末節，像：搵手抹地泥、撿掣、收衫褲這兜，

¹ 細笏瓜：音 se^ˇ ned gua^ˋ；小黃瓜。

佢還會學煮飯。有一擺，阿姆出門，阿婆當愁慮，佢講：「阿婆！毋使愁，當晝佢來煮。」米洗好，放落電鑊煮，堵好有一鑊爌肉²，佢放到瓦斯爐用文火暖燒，續等煎卵包，炒一盤薤菜，還煮一鑊包粟湯，阿姆教過佢煮湯愛細義，毋好燒著！佢還放兜香菜仔敲香，兩下半就喊老妹排碗箸，喊阿公、阿婆食飯！阿公、阿婆阿腦佢：「佢个慧孫女大囉！恁慶！」佢試著當沙鼻！

佢去到學校也會搵手，因為佢係「細先生」。看先生歸日無閒直掣，愛改一大堆个簿仔，所以佢會摺先生搵手，當晝頭就無歇睏。拿等紅色个筆，目珠擘金金檢查同學个簿仔，毋著个就用紅筆箍起來，再過請同學改正來，又順續教一下毋會个人，恁樣个工作佢毋會試著恹，感覺有摺同學搵手著。

有一句話講「多學多得」，正經哦！佢學著當多，感謝世大人分佢機會又信任佢，佢會繼續學習，佢會煮飯哩啲！

² 爌肉：音 kong^ˇ ngiug；紅燒肉。

【蹶山】劉玉蕉原作

天吉光，狗吉吠，阿姆斯特在該大聲喊咧！「阿榮啊，好跣咧，日頭愛出來哩啲！」

「阿珍妹，遽遽著鞋啲，愛出門哩啲！」

天矇光，日頭還在該睡目，偌一屋人斯目睡摸些起腳花行，共下去蹶小中崙山咧。路狹狹，草面頂个露水吉散，分偌兜个腳徑啊著，斯歸串歸串碾落地泥，一粒一粒金若若¹像珍珠樣，靚到耐毋得！偌心肝肚偷偷恸：係用佢兜來串一條珍珠骹鍊，送分阿姆戴，毋知幾靚哦！

涼爽个風，一陣一陣吹來，路脣个花花草草，分佢吹到領頭拗腰定定仔行禮，斯像該戲臺頂，盡力表演个大明星共樣。行到山下，老妹湊偌拚輸贏，看麼人做得先蹶上山崙頂去。兩儕斯恁樣頭搖搖，麼人都毋認輸，相爭拚往上。偌座大當然輸毋得，歸路毋敢停跔，氣掉氣急直直拚上山，蹶到山頂，抓等心臟，佢啊跳到硬硬像愛恬忒樣哦！

「哇！山頂个風還涼哦！」看往下，老妹還在半山排，一隻

面頰卵紅啾啾，偌看啊，廟肚个關公都無佢恁紅哦！一張嘴擘啊擘，又像細狗在該放氣，實在還生趣，還好笑！

山頂个風，特別清，特別涼爽，風裡肚有東勢果子个香氣，有花花草草个清甜味緒，這風吹到人歸身鬆爽，吹到人透心涼，頭下蹶山个艱苦，到這下也做下毋記得咧！樹頂絡食个鳥仔濟濟借借，跳上跳下叫無停，草實肚个蟲仔毋願輸佢，也唧唧滾應聲。打早，山頂斯仰般鬧熱咧！眺望²該山下，遠遠个東勢，到今還蒙等³一層紗，在濛紗煙肚睡都毋知好醒呢！

「遽遽，大家看！還靚哦！」

東片个雲像點胭脂樣，紅霞紅霞，紅霞退忒，係千條萬條金色个光，對山个背後射出來，無幾久，一隻大火球，斯對山頭跳出來咧，晟到人惹毋開目，晟到濛紗遽遽藏身。日時頭个事頭，對這下正正式起勢呢！

企在山崙頂，偌兜放勢享受打早个光景，登高眺望个開闊眼界，分人心情爽快，分人知得感恩，感恩大自然賜分偌佢恁好个環境。阿爸長下講：「早跣床个鳥仔斯有蟲仔好食。」到這下，偌總算體會著這句話个意思咧！

¹ 金若若：音 gim` na` na`；亮晶晶。

² 眺望：音 tiau` mong+；遠望。

³ 蒙等：音 miang` nen`；覆蓋、遮住。